

Osvrt na VI Kongres poljskih hidrobiologa

Od 7. — 11. IX 1964. godine održan je u Olsztynu VI kongres poljskih hidrobiologa, na kojem sam imao priliku da učestvujem. Kongres je bio posvećen dvadesetogodišnjici postojanja Narodne Republike Poljske i imao je posebno svečan karakter. Na njemu je uzelo učešće preko 250 hidrobiologa iz Sovjetskog Saveza, Čehoslovačke, Poljske i Jugoslavije, a održan je ukupno 101 referat.


Glavni referat pod naslovom: »Poljska hidrobiologija u 20 godina postojanja Narodne Republike Poljske« održao je predsjednik Poljskog hidrobiološkog društva, prof. dr. Olszewski. On je iznio ogromne gubitke, koje je poljska hidrobiologija pretrpjela u II Svjetskom ratu. Veliki dio istaknutih naučnih radnika poginuo je u ratu ili koncentracionim logorima. Mnogi Instituti bili su potpuno opljačkani ili uništeni. Mali broj preživjelih hidrobiologa našao se poslije oslobođenja pred velikim teškoćama. Manjak naučnog kadra i najpotrebnije opreme u naučnim ustanovama sa jedne strane, a priključenje novih vodenih površina Poljskoj (sliv Odre, Mazurska jezera) s druge strane, zahjevali su izdvajanje velikih materijalnih sredstava, kako bi poljska hidrobiologija ponovo zauzela visoko mjesto, koje je prije rata zauzimala. Ona je u tom pogledu u posljednjih 20 godina u potpunosti uspjela. Broj naučnog kadra u hidrobiološkim ustanovama povećao se za preko 40 puta. U tom razdoblju izdano je 1750 naučnih radova. Na teritoriju Poljske danas radi oko 80 hidrobioloških Instituta i Stanica, u kojima je zaposleno preko 300 naučnih radnika. Za razliku od predratnih, uglavnom faunističkih radova, danas se glavna pažnja posvećuje problemima neposrednog iskorištavanja stalnih voda u privredne svrhe.

Rad kongresa odvijao se na plenarnim sjednicama i u sekcijama. Na plenarnim sjednicama, pored gore spomenutog referata, iznijeti su osvrti o položaju hidrobiologije unutar hidroloških nauka, zaštiti voda od industrijskih onečišćenja, morskim biološkim problemima, eksperimentima u hidrobiologiji i historijski pregled poljske hidrobiologije do 1939. godine.

Rad u 5 sekcija odvijao se na dva načina. Svaki učesnik mogao je izabrati da li će svoj rad iznijeti

u formi referata ili demonstracije. Ovaj drugi način primjenjen je prvi put u Poljskoj, a sastoji se u tome, da se najvažniji momenti rada demonstriraju na tabelama, grafikonima i crtežima. Zainteresirane osobe stupaju direktno u kontakt sa autorom i analiziraju rezultate. Mislim da je ovaj način izlaganja materijala često mnogo pogodniji od klasičnog načina čitanja referata.

Rad u sekcijama obuhvatio je najveći broj referata i demonstracija u kojima su tretirani različiti problemi hidrobiologije: sistematika, morfologija, fiziologija, ekologija, biocenologija, kemija, ihtiologija i radioaktivnost voda.



Zgrada ribarskog i zootehničkog fakulteta u Olsztynu u kojoj je održan VI kongres poljskih hidrobiologa.

Organizacija kongresa bila je veoma dobra. Točan program i raspored održavanja referata uručen je svim učesnicima dvadesetak dana prije početka kongresa, a kratak sadržaj svih radova objavljen je u posebnoj knjizi.

Nakon završetka kongresa organizirani su izleti, sa ciljem upoznavanja raznih tipova Mazurskih jezera i historijskih znamenitosti okolice Olsztyna. Također nam je omogućeno razgledanje i upoznavanje sa radom Poljskog hidro-meteorološkog Instituta i Hidrobiološke stanice u Mikolajkama.

Bralić Vlatko